

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

Ո Ր Ո Շ ՈՒ Մ
27 մայիսի 2014 թվականի

**Համալսարանում ուսումնաարտադրական, գիտամանկավարժական և
գիտահետազոտական փորձառությունների կազմակերպման վիճակի և
դեկանատների ու ամբիոնների խնդիրների մասին**

Լսելով և քննարկելով «Համալսարանում ուսումնաարտադրական, գիտամանկավարժական և գիտահետազոտական փորձառությունների կազմակերպման վիճակը և դեկանատների ու ամբիոնների խնդիրները» հարցը (զեկուցող՝ ուսումնամեթոդական աշխատանքների գծով պրոռեկտոր, տնտեսագիտության թեկնածու, դոցենտ Պ.Ա.Քալանթարյան), գիտական խորհուրդն արձանագրում է. ռեկտորատը, կարիերայի և մարքեթինգի կենտրոնը, դեկանատները և թողարկող ամբիոնները 2013-2014 ուսումնական տարում զգալի աշխատանքներ են կատարել ուսանողության ուսումնաարտադրական, գիտամանկավարժական և գիտահետազոտական փորձառությունները պատշաճ մակարդակով կազմակերպելու և անցկացնելու ուղղությամբ: Կազմակերպությունների հետ համագործակցությունն առավել արդյունավետ դարձնելու նպատակով ընտրվել են նախկինում անտեսված մոտ յոթ տասնյակ կազմակերպություններ, որոնց ռեկտորի անունից նամակ-խնդրագրեր են ուղարկվել, ինչի արդյունքում 2013-2014 ուսումնական տարում նրանցից 16-ի հետ պայմանագրեր են կնքվել: Դրանով համալսարանի հետ համագործակցող պետական մարմինների և մասնավոր կազմակերպությունների թիվը հասել է 75-ի:

Ուսանողության փորձառություններն ուսումնական գործընթացի բաղկացուցիչ մասն են և կատարվող կրթական բարեփոխումները թելադրում են, որ համապատասխան փոփոխություններ իրականացվեն ինչպես փորձառության ծրագրերում, այնպես էլ բուհ-կազմակերպություն համագործակցության ակտիվացման ասպարեզում:

Անցած ուսումնական տարում փորձառության արդյունավետ կազմակերպման խոչընդոտները պայմանականորեն բաժանվել էին երեք խմբի, որոնք արդիական են նաև այժմ՝

1. կազմակերպական,
2. բովանդակային,
3. վերահսկողության և գնահատման:

Կազմակերպական առումով, և՛ կարիերայի և մարքեթինգի կենտրոնը, և՛ թողարկող ամբիոնները որոշ ջանքեր են գործադրել ուսանողների փորձառության վայրերի ընտրության և տեղավորման համար: 2013-2014 ուսումնական տարվա ընթացքում ուսումնաարտադրական, գիտահետազոտական և գիտամանկավարժական փորձառություններ են կազմակերպվել 2135 ուսանողի համար, որոնցից 1500-ը (շուրջ 70%)՝ խոշոր կազմակերպություններում՝ բուհի և կազմակերպությունների միջև կնքված պայմանագրերի հիման վրա:

Փորձառության անցկացման վայրերի կեսից ավելին պետական կառավարման և տեղական ինքնակառավարման մարմիններ են, իսկ 1/4-ից ավելին՝ բանկեր:

Թողարկող ամբիոնները պետք է աջակցություն ցուցաբերեն ռեկտորատին, կարիերայի և մարքեթինգի կենտրոնին՝ ստեղծագործական համագործակցության պայմանագրեր կնքելու գործում:

Կազմակերպական առումով մինչ այժմ հստակ կանոնակարգված չէ թողարկող ամբիոններից նշանակված ղեկավարների այցելությունները փորձառության վայրեր: Դա հատկապես կարևոր է փորձառության կազմակերպման առաջին օրերին, երբ օպերատիվ լուծում պահանջող տարբեր բնույթի խնդիրներ են ծագում: Հակառակ պարագայում կազմակերպությունները հաճախ տարբեր պատճառաբանություններով ուսանողների հաճախումների անհատական ժամանակացույցեր են կազմում (կանչում են շաբաթական մեկ-երկու անգամ) կամ ետ են ուղարկում, ինչի պատճառով էլ ի հայտ են գալիս ուշացած նամակ-ուղեգրերը, փորձառության վայրի փոփոխության հետ կապված դժվարությունները: Փորձառության արդյունավետությունը շեշտակի նվազում է նաև այն դեպքերում, երբ ավարտական աշխատանքների թեմաները չեն համապատասխանում փորձառության վայրի գործունեությանը:

Անկասկած, և՛ ռեկտորատը, և՛ ֆակուլտետները, և՛ թողարկող ամբիոնները որոշ աշխատանքներ են կատարել փորձառությունն ավելի բովանդակալից դարձնելու առումով: Սակայն շատ են նաև թերություններն ու բացթողումները և այստեղ ամենակարևորն այն է, որ փորձառության ծրագրերի հարցերը դեռևս միտված չեն ուսանողների տեսական գիտելիքները գործնականում կիրառելու հմտությունների աճին:

Թերությունների հաջորդ խումբը կապված է վերահսկողության և գնահատման հետ: Իրողությունն այն է, որ հաճախումների նկատմամբ թույլ վերահսկողությունն ու անտարբերությունը կամ դրա բացակայությունը ոչ միայն կազմակերպությունների կողմից է, այլ նաև համապատասխան ամբիոնների: Դա իր արտացոլումն է գտնում գնահատման ասպարեզում: Կան ամբիոններ, որնք փորձառությունների հաշվետվությունների պաշտպանության ժամանակ չափազանց լոյալ վերաբերմունք են ցուցաբերում, շոայլում են «գերազանց» գնահատականները, ինչն ուղղակիորեն ազդում է փորձառության կարևորության գիտակցման վրա:

Փորձառություններն արդյունավետ կազմակերպելու, առկա թերությունները վերացնելու նպատակով՝ համալսարանի գիտական խորհուրդը **որոշում է.**

1. Հանձնարարել կարիերայի և մարքեթինգի կենտրոնին, թողարկող ամբիոնների վարիչներին՝

ա) գործուն քայլեր ձեռնարկել ինչպես պետական կառավարման մարմինների, այնպես էլ տնտեսության բոլոր ոլորտների կազմակերպությունների հետ համագործակցության նոր պայմանագրեր կնքելու ուղղությամբ:

2. Հանձնարարել թողարկող ամբիոնների վարիչներին՝

ա) արդիականացնել փորձառությունների ծրագրերը, դրանք համապատասխանացնել կրթական բարեփոխումների նոր պահանջներին,

- բ) խստացնել հսկողությունը փորձառության անցնող ուսանողների հաճախումների նկատմամբ,
- գ) պահանջել ղեկավարներից, որ փորձառության ընթացքում առնվազն երկու անգամ լինեն տեղերում՝ ծրագրով տրված հանձնարարականների կատարման ընթացքը վերահսկելու և կազմակերպություններից նշանակված ղեկավարների հետ փորձառության արդյունավետության բարձրացման հարցերը քննարկելու համար,
- դ) բացառել փորձառությանը չհաճախող ուսանողների հաշվետվություն ներկայացնելու և պաշտպանելու հնարավորությունը:

3. Հանձնարարել ուսումնամեթոդական աշխատանքների և աշխատաշուկայի հետ համագործակցության բաժնին՝

- ա) խիստ վերահսկողություն սահմանել բոլոր մասնագիտություններով փորձառությունների ծրագրերն արմատապես փոխելու, դրանցում գործնական առաջադրանքների բաղադրիչն ուժեղացնելու և կազմակերպությունների գործունեության բնույթին ու առանձնահատկություններին համապատասխանեցնելու նկատմամբ:

4. Սույն որոշումը քննարկել ղեկնատների և թողարկող ամբիոնների նիստերում և համապատասխան աշխատանքներ կատարել նշված հանձնարարականների կատարման համար:

5. Սույն որոշման կատարման նկատմամբ հսկողությունը վերապահել ուսումնամեթոդական աշխատանքների գծով պրոռեկտոր Պ.Ա.Քալանթարյանին և ուսումնակազմակերպական աշխատանքների գծով պրոռեկտոր Մ.Ն.Հարությունյանին:

Գիտական խորհրդի նախագահ

Կ. Լ. Աթոյան

27.05.2014 թ.

ք. Երևան